

Sikũn Tesarõn

Pawre kot Tesarõn kamã Jejus kôt kwỳjê hwỳr wam kagà nê mênh kôt hõ kagà nê mênh

Pawre na pre kagàja nhípêx nê ma Tesarõn kamã Jejus kôt hkwỳjê hwỳr kumê. Na pre hte Tesarõn kamã mẽ kãm Jejus ã mẽ hkurê xwỳnhjaja Jejus ã tanhmã mẽ homnuj to nhũm mẽ amnhĩ xà htỳx kamã hamak o pa. Hãmri nhũm Pawre mẽ harênh ma nê kagàja nhípêx nê mẽ hwỳr kumê. Nê kamã mẽ kãm mẽ hamaxpêr o hihtỳx. Nê mẽ kot arĩ Tĩrtũm kôt amnhĩ nhípêx mex o pa nê hamaxpêr kôt hamaxpêr o pa hã mẽ kãm karõ. Nê nhỹrmã Jejus akupỳn kaxkwa rũm mẽ pahpê hkrajê hwỳr wrỳk nê pika ho hapêx par ã mẽ kãm harê. ã Na pre Pawre mẽ kãm kagàja kamã mẽ kãm ujarênh anê. Nê mẽ kãm:

1 1Pa Tesarõn nhõ xwỳnh kot Tĩrtũm kapêr mar kaxyw axpên wỳr mẽ apikuprõnh xwỳnhjaja? Xà mẽ amex na ka mẽ apa? Ixpê Pawre na pa axte mẽ awỳr kagà nhípêx nê kumê. Siras mẽ Ximotre mẽ pa mẽ awỳr kumê. Nà mẽ pahpê Měpanhĩpêxà maati Tĩrtũm mẽ Kra Jejus Kris kwỳ na pu mẽ. 2Jakamã na pa htem mẽ ato wa hwỳr rãhã ho ri ixpa. Wa kot mẽ akutã nojarêr rãhã ka mẽ ajamakêtkati nê apa kaxyw. Nê mẽmoj to mẽ akutã wa nojarêr rãhã ho pa kaxyw.

Tĩrtũm kot nhỹrmã hkrajê nhípêx kati xwỳnhjê homnuj tỳx ã harênh
Wam Pêtre 4.12-19

3Nê na ka htem amnhĩ kaxyw Tĩrtũm mã ajamaxpêr tỳx mex o ri apa. Nê axpên kutã anojarêr rãhã nê. Na pa htem ã mẽ ate amnhĩ nhípêx anhỹrja mã ijamaxpêr nê mẽ anhỹ hã ixkĩnh nê Tĩrtũm mã mẽ anhỹ hã ixkĩnh ã amnhĩ jarê. 4Nê nhỹhỹm ixpa nê nhỹri krĩm agjê nê kamã Tĩrtũm kôt mẽ pahkwỳjê mã mẽ ato amỹra nê mẽ kãm:

—E pa mẽ amã Tesarõn kamã Kris kwỳjê jarê ka mẽ inhma. Nà mẽ õ krĩ kamã mẽ hkwỳjaja na htem Kris ã mẽ hipêx kati ho pa nhũm htem amnhĩ xà htỳx kamã hamak pê mex kêt nê pa. Tã nom tee ri amnhĩ kukamã hamaxpêr o Jejus kaga hkêt nê. Na htem arĩ hkôt amnhĩ nhípêx mex rãhã ho pa. Anê.

5Ā mẽ ate mẽ kutā amnhĩ nhĩpêx anhÿr o apaja na hte Tirtūm hã mẽ apumu nê hkĩnh nê pa. Nê mẽ akukamã hamaxpêr o:

— Mẽ kot Ixkra Jesus ã tanhmã mẽ hipêx to ho pa htã âm hãmri na htem mẽ kutā amnhĩ to htÿx o pa nê mẽ umaj wa ixkaga hkêt nê. Na htem ã amnhĩ nhĩpêx anê nê mẽ kêp ixkra hã amnhĩ to amnhĩrit mex nê. Nà koja mẽ nhÿrmã wa ixri mex kumrêx nê htĩr tūm nê pa ho pa.

Anhÿr o hamaxpêr. 6Nê mẽ kot Kris ã mẽ anhĩpêx punuj xwÿnhjaja koja Tirtūm nhÿrmã mẽ atã mẽ homnuj tÿx nê nhũm mẽ amnhĩ xà htÿx kamã hamak rãhã ho pa. Âm hãmri koja ã mẽ atã mẽ hipêx anê. 7-10Koja Pahihti Jejusja nhÿrmã man akupÿn pika hwÿr hirã htÿx kãm wrÿ nhũm Tirtūm kapêr o mẽ wrÿk xwÿnh xihtÿx xwÿnhjaja man hkôt wrÿ. Koja mẽ wrÿ hãmri nê mẽ kot amnhĩ tomnuj xwÿnhjê homnuj tÿx kumrêx. Jao ma mẽ kot amnhĩ xà htÿx kamã hamak tūm xàta wÿr mẽ rênh pa nhũm mẽ kamã htĩr tūm nê amnhĩ xà htÿx kamã hamak rãhã ho pa ho pa. Koja ã Pahihtija amnhĩ nê mẽ kot hkôt amnhĩ xunhwÿr kêt xwÿnhjê rênh anê nhũm mẽ pahkĩnhã Tirtūm mẽ Krata wa kuri mex nê pa hkêt nê. Nê mẽ pahkĩnh ã wa mex o wa mex nê wa hihtÿx o wa hihtÿx ã wa omunh kêt nê. Koja Pahihti Jesus nhÿrmã akupÿn wrÿ nê ã mẽ panê mẽ hipêx anê. Koja wrÿ pu mẽ amnhĩ kaxyw hkôt pajamaxpêr xwÿnhjaja amnhĩ wÿr omu nê pahkĩnh nê. Hãmri nê amnhĩ nhĩ nyw ã amnhĩ pumu nê kãm:

— Hêxta waa nê. Amex o amex Pahihti. Na ka pre mẽ inhnê ty hãmri nê mẽ inhmã mẽ inhĩ nyw gō. Kot paj mẽ Tirtūm mẽ war ari inhmex kumrêx nê ixtĩr tūm nê ixpa ho ixpa. Âm hãmri na ka ã mẽ ixto mex anê. Nà amex kumrêx o amex kumrêx Pahihti. Anê.

Ā kot puj mẽ pahpê hkwyjaja amnhĩ tã kãm mex o mex ã harênh anê. Ra mẽ ate mẽ ixkapêr mar nê hkôt amnhĩ xunhwÿr jakamã kot kaj mẽ ixpyrà nê ã kãm mex o mex ã harênh anê.

Pawre kot Tesarōn nhõ xwÿnhjê ho Tirtūm wÿr ã harênh

11-12Nê na pa htem mẽ ato Tirtūm wÿr rãhã ho ixpa nê kãm:

— Pa Tirtūm? E Tesarōn kãm akrajaja na pa mẽ ho awÿ. Na ka hte Akra Pahihti Jesus Kris mẽ wa mẽ ho mex rax o apa. Jao amnhĩm mẽ arê nhũm mẽ ra kãm amnhĩ to mex prãm nê. Na htem amnhĩ kaxyw Jesus mã hamaxpêr rãhã pê mẽmoj to axpên kutã nojarêt o pa. Jakamã kwa tanhmã mẽ hkrã hto kê mẽ akôt ã amnhĩ nhĩpêx anhÿr rãhã ho pa. Kêr ka mẽ kot akôt amnhĩ nhĩpêx o pa hã mẽ omu nê akĩnh nê mẽ kãm mẽ mex ã mẽ harê. Nhũm mẽ ate tanhmã mẽ ho mex to hã amnhĩ tã apumu hãmri nê mẽ amnhĩ pyrà nê amã amex o amex ã ajarênh rãhã ho pa. Anê.

Kot amnhĩ tomnuj tỳx kumrēx xwỳnh maati jarēnh*Matêwre 24.23-25; Makre 13.14-23; Rukre 21.20-24;**Wam Juāw 2.18-19; Apokarip 13.1-18*

2 1Ně koja nhỹrmã mẽ panhõ Pahihti Jejus Kris akupỳn wrỳ pu mẽ ma kutã api nẽ kakrã kamã hkaxpa. Jakamã kwa Jejus kôt ixkwỳjaja. 2Koja mēhõ mẽ awỳr mō nẽ mẽ amã Jejus ra akupỳn wrỳk ã harēnh japêr. Rỳ tanhmã mẽ amã Jejus hpôx xà hã arĩgro jarēnh o hêx to nẽ mẽ amã:

—Kwa na ra Jejus akupỳn nojarê. Kojã tokyx akupỳn mẽ pahwỳr wrỳ. Semã ja kamã rỳ ko. Apu hõ hã koja apu wrỳ rỳ ko.

Anhỹr o harẽ. Nẽ Tĩrtũm Karõ nhỹ hã ã kot mẽ amã harēnh anhỹr ã amnhĩ jarẽ rỳ nhãm mēhõ kot ã kãm harēnh anhỹr ã harẽ. Rỳ pa ixte harēnh nẽ hã kagã hã ijarẽ. Nom kwa kêr ka mẽ kapêr ma nẽ ãm ama nẽ hkôt ajamaxpêr kêt nẽ. Rỳ ama nẽ tee ri amnhĩ kukamã ajamaxpêr kêt nẽ. Kojã mēhõ ã mẽ amã Jejus tokyx wrỳk ã harēnh anẽ nẽ ãm amnhĩ krã hkôt ã harēnh anhỹr o hêx. Nom Tĩrtũm Karõ nhỹ hã rỳ pa inhỹ hã rỳ nhãm Kris kôt mẽ panhĩõ nhỹ hã ã harēnh anhỹr kêt nẽ. 3-4Jakamã kêr ka mẽ ãm mẽ kot harēnh o hêxja ma nẽ hkôt ajamaxpêr kêt nẽ. Kormã Pahihti Jejusja akupỳn nojarê kêt. E kot paj ixprĩ hã mẽ amã ja jarẽ ka mẽ inhma. Nã kormã Pahihti akupỳn nojarê kêt ri koja mẽ ohtô rax kumrēx nẽ Tĩrtũm kutã amnhĩ xunhwỳ nẽ kãm hkurê ho pa. Nẽ amnhĩ tomnuj tỳx o pa. Hãmri nhũm ra kot amnhĩ tomnuj tỳx kumrēx xwỳnh maatija amnhĩ to amnhĩrĩt. Nom na pre ra Tĩrtũm tanhmã kot hipêx to hkukamã hã amnhĩ jarẽ. Kojã xep gaa nẽ ma mẽ kot amnhĩ xà htỳx kamã hamak tũm xàta wỳr kumẽ nhũm kamã amnhĩ xà htỳx kamã hamak o pa rãhã nẽ pa ho pa.

Tã nom kormã Pahihtija akupỳn wrỳk nẽ ma hwỳr mēnh kêt ri koja mẽ piitã omu nẽ kêp Mēhpãm maati pixi hã harēnh kaxyw mẽ kêp mẽ õ sãnti piitã hkrakrak pa. Nẽ mẽ kot mēmo karõ ho amnhĩ pãm ã harēnh xwỳnhja nhũm piitã hkrakrak pa. Hãmri nẽ axtem nẽ Tĩrtũm mã amnhĩ jarēnh xà hã ixkre jatur xà kamã hitom wỳr axà nẽ kamã nhỹ nẽ hêx rom mẽ piitã mẽ kãm kêp Tĩrtũm ã amnhĩ to hêx nẽ mẽ kãm:

—E mẽ amnẽ ixpumu. Ixpê mẽ anhõ Tĩrtũm na pa. Pa kot kaj mẽ inhmã inhmex o inhmex ã ijarẽ. No kêr ka mẽ anhõ sãnti ho apãm o apa hkêt nẽ. Kwarĩ ho kwarĩ. ãm paxipix ixpê Mēapãm maati nẽ paxipix ixpê mẽ anhõ Tĩrtũm.

Anhỹr o amnhĩ to hêx. 5Na pa pre arĩ mẽ akôt ixpa ri ã mẽ amã harēnh anẽ. Mãn arĩ mẽ ate ja hã anohtỳx rỳ ko. 6Nom kormã ã kot amnhĩ nhĩpêx anhỹr xà hã arĩgrota kormã kator kêt. Mēhõ kormã

kot kêp àmnàr jakamã nhũm kormã kator kêt nê. Ra mẽ ate kêp àmnàr xwỳnhja jarênh mar. Tã koja hpôx xà hã arígro kato nhũm kêp àmnàr xwỳnhhta kãm pry kaprà nhũm rĩ kormã mỗ. 7Nom na hte ra hpimxur pê Tĩrtũm nê mẽ piitã mẽ hkurê ho pa. Mẽ kot Tĩrtũm kôt amnhĩ xunhwỳr pymaj tanhmã nê mẽ ho ho pa. Nom kormã kêp àmnàr xwỳnhja kêp àmnàr jakamã nhũm hte mẽ noo mã tanhmã mẽ ho hkêt nê. Tã koja Tĩrtũm nhỹrmã kêp àmnàr xwỳnhja mã anê nhũm kuma nê kãm ure nhũm rĩ kormã amnhĩ to amnhĩrit nê mẽ piitã mẽ noo mã mỗ nê Tĩrtũm nê tanhmã mẽ kãm hêx to ho pa. 8-12Koja kato nê Satanasti mẽ wa mẽ piitã tanhmã mẽ nokupyr to ho ri mẽ hkôt pa. Nê hêx rom mẽ kãm aa mẽ kot mẽmoj pumunh kêt kwỳ ho anhỹr o ri pa. Koja wa hêx rom te Tĩrtũm kot amnhĩ nhĩpêx pyrãk o ã amnhĩ nhĩpêx anê. Hãmri nhũm mẽ kot Jejus kôt amnhĩ xunhwỳr kêt xwỳnhjaja ja hã wa omu nê wa hkôt hamaxpêr kurê kumrêx. Nê ãm hãmri wa kapêr ã wa hkamnhĩx. Kop apu ra mẽ kot Tĩrtũm kapêr mar nê hkôt amnhĩ xunhwỳr ronhỹx ra Tĩrtũm amnhĩ tã mẽ omu nê mẽ ho hkra. Nom koja mẽ kãm kapêr mar prãm kêt nê. ãm wa kot amnhĩ to hêx o wa pa xwỳnhhta kôt pix mã koja mẽ kãm amnhĩ nhĩpêx prãm.

Ja mỳrapê koja Tĩrtũm tee ri ja hã mẽ omu hãmri nê mẽ nê wa kot amnhĩ tomnuj tỳx xwỳnhhta wa omunh kêt nhũm wa tanhmã mẽ kãm amnhĩ nhĩpêx to nhũm mẽ wa omu nê wa hkôt hamaxpêr kurê kumrêx. Hãmri nê wa gryk ã Tĩrtũm kaga jakamã nhũm nhỹrmã mẽ kot amnhĩ xà htỳx kamã hamak tũm xàja wỳr mẽ rênh pa.

Koja Satanasti mẽ kot amnhĩ tomnuj tỳx kumrêx xwỳnh maatita ã hêx rom tanhmã mẽ no kupyr to anhỹr o pa rãhã nhũm Pahihti Jejusja hirã rax kãm akupỳn mẽ pahwỳr wrỳ. Hãmri nê kot amnhĩ tomnuj tỳx kumrêx xwỳnh maatita ã amỳnê nhũm mẽ kãm hpĩr kurê kumrêx nhũm hapêx. Koja ã amnhĩ nhĩpêx anê.

Tĩrtũm kot tanhmã mẽ pahto mex to hã harênh

Rõmãn 8.28-30; Wam Tesarõn 2.13, 5.23-24

13Nê amnepêm kormã mẽmoj kêt ri na pre Tĩrtũm amnhĩm mẽ arê. Mẽ ate kapêr mar nê hkôt amnhĩ xunhwỳr nhũm kot mẽ ato hkra kaxyw mẽ arê. Kãm mẽ ajapêê. Na pre mẽ awỳr amnhĩ Karõ rê nhũm mẽ akarõ mã agjê nê tanhmã mẽ ajamaxpêr to ka mẽ ỹ hã tãm amnhĩ nhĩpêx rãhã ho ri apa. Na pa htem ja hã mẽ amã ijamaxpêr nê mẽ anhỹ hã ixkĩnh kãm Tĩrtũm mã mẽ ajarênh o ri ixpa. 14Na pre mẽ awỳr mẽ ixrê. Mẽ ixte mẽ awỳr ixpa nê mẽ amã tanhmã Jejus kot mẽ panê amnhĩ nhĩpêx to hã harênh o ixpa kaxyw. Mẽ ate mẽ inhmar nê Jejus kôt amnhĩ xunhwỳr nhũm Tĩrtũm kot Pahihti Jejus Kris o mex pyrã nê tanhmã mẽ ato mex to kaxyw. 15Jakamã kwa kêr ka mẽ ra mẽ ixte wam mẽ awỳr kagà

mẽnhta kamã harẽ nõ mar tỳx nõ. Nẽ mẽ akõt mẽ ixpa ri tanhmã mẽ ixte mẽ ajahkre htoja mã ajamaxpẽr mex nõ hã ano htỳx nõ hkõt amnhĩ nhĩpẽx rãhã ho ri apa. Jao Jejus kõt amnhĩ nhĩpẽx mex o ri apa Kris kõt ixkwỳjaja.

16Mẽpanhĩpẽx`a maati mẽ Pahihti Jejus Kris wa kãm mẽ pajapê htỳx kumrẽx. Na hte wa tanhmã mẽ pajamaxpẽr o hihtỳx to ho pa pu mẽ wa ỹ hã tãm pajamaxpẽr o ri papa. Nẽ wa ỹ hã nhỹrmã wa kuri pamex nõ pahĩr tũm nõ papa hkukamã pajamaxpẽr kaprỳ ho papa hkêt nõ. 17Na pa htem mẽ ato wa hwỳr o ixpa nõ wa kãm:

—Pa Tĩrtũm mẽ Jejus wa? Kwa kêt ka wa tanhmã Tesarõn kamã akrajẽ mã mẽ hamaxpẽr o hihtỳx to kêt mẽ war anhỹ hã tãm amnhĩ nhĩpẽx nõ tãm hamaxpẽr. Jao kapẽr mex rãhã nõ pa ho pa. Anẽ.

**Tanhmã mẽ pahte axpẽn to Tĩrtũm wỳr to hã kot
mẽ pamã karõ
Korosẽ 4.2-4**

3 1Nẽ kwa Kris kõt mẽ ixtõ nõ ixtõxjaja. Kêt ka mẽ amnhĩ xwar mẽ ixto Tĩrtũm wỳr rãhã ho ri apa. Mẽ ixte krĩ piitã hkõt mẽ kãm Jejus jarẽnh o ri mẽ hkõt ixpa nhũm mẽ kot mẽ inhmar nõ amnhĩ kaxyw Jejus kõt hamaxpẽr kaxyw. Jao mẽ apyrã nõ hkõt amnhĩ nhĩpẽx mex o pa kaxyw. 2Nom koja mẽ piitã ã amnhĩ nhĩpẽx anhỹr kêt nõ. Mẽ hkwỳjaja kãm Jejus jarẽnh mar prãm kêt jakamã kwa mẽ ixto Tĩrtũm wỳ kêt mẽ inhnẽ mẽ omunh mex nõ nhũm mẽ Jejus ã tanhmã mẽ ixto hkêt nõ.

3Nẽ koja Pahihti tanhmã mẽ akrã hto ka mẽ ajamaxpẽr mex nõ ỹ hã hkõt amnhĩ xunhwỳr tỳx o ri apa. Jakamã nhũm Satanasti mẽ ate amnhĩ tomnuj hprãm xaj tee ri tanhmã mẽ anhĩpẽx to kaprỳ nhũm Pahihti mẽ anẽ omunh mex nõ. Ra kot mẽ atã amnhĩ jarẽnh xà hkõt. 4Koja ã mẽ anẽ hipẽx anẽ ka mẽ ỹ hã tanhmã mẽ ixte mẽmoj tã mẽ amã karõ xà hkõt amnhĩ nhĩpẽx mex o ri apa. 5Tã kêt Pahihti tanhmã mẽ akrã hto ka mẽ Tĩrtũm pyrã nõ mẽ piitã mẽ kamã axukaprĩ ho ri apa. Nẽ Pahihti Kris pyrã nõ mẽmoj punuj kutã amnhĩ to htỳx nõ. Jao hkõt amnhĩ nhĩpẽx mex rãhã ho ri apa.

Mẽ kãm kaga xwỳnhjẽ jarẽnh

Wam Korĩt 4.12; Epes 4.28; Wam Tesarõn 4.9-12

6E kot paj hpãnhã Kris kõt mẽ pahkwỳ kãm kaga xwỳnhjẽ jarẽ ka mẽ inhma. Pahihti Jejus nhỹ hã kot paj mẽ amã tanhmã mẽ harẽnh to. Nã koja mẽ akwỳjaja kãm kaga nõ amnhĩm mẽmoj tã àpẽn h kêt japêr. Nẽ mẽ ixte mẽ axàpẽn mex o apa hã mẽ amã karõja kuhpa hã amnhĩm mẽmoj tã àpẽn h kêt japêr. Koja mẽ ã amnhĩ nhĩpẽx anẽ


ka mẽ ja hã mẽ omu hãmri nẽ mẽ hkôt ri apa hkêt nẽ. 7-8 Xà mẽ pajaja na pa prem ma mẽ awÿr mō nẽ mẽ akôt inhmã kaga nẽ mẽmoj tã ixàpênh kêt nẽ ri ixpa? Nà na pa prem mẽ apa kukwak ri ixàpkur pymaj ixàpênh rũnh nẽ amnhĩ pa pix kukwak ri ixàpkur o ri ixpa. Na ka prem mẽ inhmã mẽmo mẽ apkur xà ho mra pa prem amarĩ amnhĩm hamÿnh nẽ hkur kêt nẽ. Na pa prem hpãnhã mẽ amã amnhĩre nẽ kormã kuku. Tã kêr ka mẽ ã amnhĩ nhĩpêx anhÿr o ri axpên kôt apa nẽ amnhĩ pa pix kukwak ri apku. Nẽ mẽ amã kaga hã nhãm akwÿjê hpa kukwak ri axàpkur o ri apa kêt nẽ. 9 Na pa prem amnhĩ pa pix kukwak ri ixàpkur o ri mẽ akôt ixpa. Mẽ ate ja hã mẽ ixpumunh nẽ mẽ ixpyrà nẽ ã amnhĩ nhĩpêx anhÿr kaxyw. Nom mẽ ixte Jejus mã tanhmã mẽ ajahkre hto nhũm mẽ ate mẽ inhmar nẽ hpãnhã mẽ inhmã mẽ ixàpkur xà nhōrja Jejus mã tanhmã kute hkêt tã pa prem ã amnhĩ nhĩpêx anhÿr kêt nẽ. Mẽ ate ja hã mẽ ixpumunh nẽ mẽ ixpyrà nẽ ã amnhĩ nhĩpêx anhÿr kaxyw na pa prem amnhĩ pa pix kukwak ri ixàpkur o ri mẽ akôt ixpa. 10 Na pa prem mẽ amã ja hã karō ho:

—Koja mẽhō kãm kaga nẽ àpênh kêt nẽ ka mẽ ja hã omu nẽ kãm ò hkêt nẽ. Kwār mãmri apkur kêt nẽ kãm prãm nẽ ri pa nẽ amnhĩ pumu. Anẽ.

11 Tã xep ra mẽ akwÿjaja ã amnhĩ nhĩpêx anẽ nẽ kãm kaga nẽ àpênh kêt nẽ amarĩ ri pa. Nẽ xep htÿx ri axpên jakwa kamã nhãm mẽ hixi ho rêr o ri pa. 12 Kwa mẽ inhma Jejus kôt ixkwÿjaja. Kot paj Pahihti Jejus nhÿ hã mẽ amã mẽ kot ã amnhĩ nhĩpêx xwÿnhjê jarê ka mẽ inhma nẽ mẽ inhmar tÿx nẽ. Kêr ka mẽ kãm kaga xwÿnhjê mã anẽ kê mẽ jam ure nẽ hpãnhã àpênh mex o pa. Jao mẽ apyrà nẽ amnhĩ pa kukwak ri apkur o pa. Kêr ka mẽ ã mẽ kãm ixkapêr jarênh anẽ.

13 Nẽ kwa kêr ka mẽ axpên to mex o apata kaga hkêt nẽ.

14 E na pa mẽ ã Tirtũm nhÿ hã mẽmoj tã mẽ amã karō nẽ hã kagà anẽ. Tã koja mẽhō kamã harê nẽ kuma nẽ ãm kuma nẽ hkôt amnhĩ nhĩpêx kêt ka mẽ ja hã omu nẽ hkôt ri apa hkêt nẽ. Tokyx kot ja hã amnhĩ pumunh nẽ amnhĩ tã hpijaàm kaxyw. 15 Nom arĩ Kris kôt kêp mẽ akwÿ jakamã kêr ka mẽ arĩ kêp mẽ atō rÿ atōx ã tãm hipêx nẽ kãm akapêr mex o ri apa. Nom te ho kêp mẽ akwÿ hkêt pyrāk o kãm akapêr kêt nẽ.



Sikūn Tesarōn 3.13-15

Tanhmã Pawre kot mẽ ho Jejus wỳr to hã harẽnh

16-18 Nẽ na pa hte mẽ ato Pahihti Jejus wỳr rãhã ho ixa. Kot mẽ pamã mẽ pajamakêtkati xà nhõr jakamã na pa htem mẽ ato kuwỳ nẽ kãm:

— Pa Pahihti? Kwa kêr ka Tesarõn kamã akwỳjê pumu nẽ mẽmoj to mẽ kutã anojarêt rãhã ho ri mẽ hkôt apa. Kê mẽ hamakêtkati nẽ àmnhĩx pa ho pa. Anẽ.

Tã ãm ja pix. Ixpê Pawre na pa kagà jatur xà kamã inhĩkra ho amnhĩ nhĩxi nhĩpêx. Na hte kagà nhĩpêx xwỳnh inhmã ixkapêr ã kagà. Nẽ hã kagà hpa pa hpãnhã hatur xà kamã pam inhĩxi nhĩpêx. Tã na hapêx.